

आकाशवाणी

खास-खास खबरां:-

- भारत नै मुल्खै अंदर डिजाइन ते त्यार कीते गेदे प्रोटोटाइप फास्ट ब्रीडर रिएक्टर च क्रिटिकैलिटी कन्नै इक बड़्डी कामयाबी हासल कीती ऐ।
- प्रधानमंत्री नरेन्द्र मोदी होरें इसी देश दी वैज्ञानिक छमता ते इंजीनियरिंग समर्था दी मजबूती दा सबूत करार दिता ऐ।
- असम- केरलम ते पुदुचेरी च होने आहले विधानसभा चुना लेई प्रचार अभियान अज्ज सम्मन्न होआ रदा ऐ।
- राष्ट्रपति द्रौपदी मुरमू होरें आंध्र-प्रदेश पुनगठन तरमीमी बिल -2026 गी मंजूरी दिती ऐ- जेहदे तैहत अमरावती गी आंध्र-प्रदेश दी स्थाई राजधानी घोषत कीता गेआ ऐ।
- भारतीय फौज नै माहनू रहत ब्हाई प्रणाली दे ड्रोन कन्नै जुड़े दा तकनीकी खाका जारी कीता ऐ।
- अमरीकी राष्ट्रपति डोनाल्ड ट्रम्प होरें धमकी दिती ऐ जे जेकर ईरान होर्मुज जल डमरु मध्य खोलने दी अमरीका दी शर्त नैई मन्नदा तां उसी इक रात च तबाह करी दिता जाग।

<><><><><><>

PM - Nuclear Energy

तमिलनाडू दे कलपक्कम च मुल्खै अंदर डिजाइन ते त्यार कीते गेदे प्रोटोटाइप फास्ट ब्रीडर रिएक्टर नै क्रिटिकैलिटी हासल करी लैती ऐ- जेहदे कन्नै गै भारत दे परमाणु ऊर्जा कार्यक्रम च इक महत्वपूर्ण उपलब्धि दर्ज कीती गेई ऐ। प्रधानमंत्री नरेन्द्र मोदी होरें इस ऐतिहासिक उपलब्धि दी सराहना कीती ऐ। कल रातीं सोशल मीडिया पर अपने इक सनेए च मोदी होरें आखेआ कि भारत अपनी नागरिक परमाणु ऊर्जा यात्रा दे इक महत्वपूर्ण पड़ां पर पुज्जी गेआ ऐ- जित्थे ओ इक फैसलाकुन गें पुट्टै करदा ऐ- जेहड़ी देसै दे त्रै चरणें आहले परमाणु कार्यक्रम दे दुए गेइ गी अगड़े बधांदा ऐ। रिएक्टर दे तकनीकी महत्व गी उजागर करदे होई प्रधानमंत्री होरें आखेआ कि एह उन्नत रिकटर जेहड़ा खपत कोला मता ईंधन उत्पादन करने च सक्षम ऐ- देश दी वैज्ञानिक छमता ते इंजीनियरिंग हुनर समर्था दी मजबूती गी दर्शांदा ऐ।

<><><><><><>

Assembly Polls -Campaign

असम- केरलम ते केन्द्र शासित प्रदेश पुदुचेरी च होने आहले विधानसभा चुनावं लेई प्रचार अभियान अज्ज सम्पन्न होई जाहग। असम दी 126 सीटें- केरलम दी 140 सीटें ते पुदुचेरी दी 30 सीटें लेई मतदान वीरवारं इक्कै चरण च करोआया जाहग। कल वरिष्ठ बी.जे.पी. नेता ते प्रधानमंत्री नरेन्द्र मोदी हों असम दे बरपेटा-होजाई ते Dibrugarh च जनसभाएं गी सम्बोधित कीता। मोदी हों भरोसा दोआया जे बी.जे.पी. असम च लगातार त्री बारी सरकार बनाग। उंनै इस गल्लै गी फही दोहराया जे राज्य दे हर जिले ते क्षेत्र दा विकास उन्दी पार्टी ते NDA दी पैहली प्राथमिकता ऐ। उंनै आखेआ जे पिच्छले 10एं बरे च असम नै शांति ते समृद्धि दा दौर दिक्खेआ ऐ। तोंआई तमिलनाडू च इक गेड़ दे मतदान ते पच्छम बंगाल च पैहले चरण दे मतदान लेई दाखल नामांकन पतरें दी जांच अज्ज कीती जाहग। दौनें राज्यें च नामांकन दाखल करने दी प्रक्रिया कल समाप्त होई गई- जिससलै के मेदवार- वीरवार तोड़ी अपने नांs वापस परताई सकदे न। तमिनाडू दी सब्भै 234 विधानसभा सीटें ते पच्छम बंगाल दी पैहले गेड़ दी 152 सीटें पर मतदान इस म्हीनें दी 23 तरीक गी होग। पच्छम बंगाल दे दुए चरण दा मतदान 29 तरीख गी 142 सीटें पर कराया जाना ऐ। चौनें राज्यें ते केन्द्र शासित प्रदेश लेई वोटें दी गिनतरी अगले म्हीने दी 4 तरीख गी होग।

<><><><><><>

CEC Removal Notices

राज्यसभा दे सी.पी.राधाकृष्णन ते लोकसभा अध्यक्ष ओम बिरला हों मुख निर्वाचन आयुक्त जानेश कुमार हुंदे खिलाफ विरोधी धड़े दे सदस्यें आसेआ आंदे गेदे प्रस्ताव दे नोटिस गी खारिज करी दिता। राज्यसभा सचिवालय ते लोकसभा सचिवालय नै बक्खरे तौरा पर जानकारी दिंदे होई आखेआ जे प्रस्ताव पर विधिवत विचार ते सब्भै सरबंधत पैहलुएं पर निरपक्ख आंकलन दे बाद- राज्यसभा सभापति ते लोकसभा अध्यक्ष हों इस प्रस्ताव गी स्वीकार करने थमां इंकार करी दिता ऐ। एह पैहली बार ऐ जिसलै विपक्ष नै लोकसभा ते राज्यसभा दोनें सदनें च मुख निर्वाचन आयुक्त जानेश कुमार खलाफ प्रस्ताव दा नोटिस आंदा गेआ हा।

<><><><><><>

Prez Assent –Amravati

राष्ट्रपति द्रौपदी मुरमू हों आंध्र-प्रदेश पुर्नगठन तरमीमी बिल 2026 गी मंजूरी देई दिती ऐ। एहदे तैहत अमरावती गी अधिकारिक तौरा पर आंध्र-प्रदेश दी इक्कै ते स्थाई राजधानी घोषत कीता गेआ ऐ।

कन्नून मंत्रालय दी इक अधिसूचना च आखेआ गेआ ऐ कि राष्ट्रपति होरें कल इस विधेयक गी अपनी मंजूरी देई दिती ऐ। लोकसभा ते राज्यसभा नै पिच्छले हफते बजट इजलास दे दौरान आंध्र-प्रदेश पुर्नगठन तरमीमी बिल 2026 पास कीता हा।



Army- UAS

भारती सेना नै नमीं दिल्ली च माहनू रहत ब्हाई प्रणाली ते ड्रोन कन्नै जुड़ी प्रोद्योगिकी रोडमैप परा परदा गोआड़ेआ ऐ- जेहदे तैहत इक दस्तावेज जारी कीता गेआ। भारतीय सेना नै आखेआ कि एह रोडमैच यानि खाका उद्योग शिक्षा ते अनुसंधान ते विकास संस्थानें गी रासपूजी लाने ते तकनीकी जतनें गी प्राथमिकता आहले क्षेत्रे बक्खी निर्देशित करने लेई स्पष्ट ते कारवाई जोग दिशा-निर्देश जारी करदा ऐ।



Trump-Hormuz Warning

अमरीका दे राष्ट्रपति डोनाल्ड ट्रम्प होरें कड़ी चेतावनी जारी करदे होई आखेआ जे जेकर ईरान- समझौता करने च असफल रौहन्दा ऐ ते वैश्विक ऊर्जा आपूर्ति दे महत्वपूर्ण मार्ग होर्मुज जलडमरु मध्य तय समय-सीमा सोआं पैहले नैई खोलेआ जंदा ते अमरीका इक्के रातीं च ईरान गी तबाह करी सकदा ऐ। राष्ट्रपति ट्रम्प होरें भारती समें मताबक कल बड्डलै साड्डे 5 बजे तगर समझौते पर फैसले दी समें-सीमा तय कीती ऐ। व्हाईट हाउस च इक प्रैस वार्ता दौरान उ'नें आखेआ जे जेकर जलडमरु मध्य बंद रौहन्दा ऐ ते अमरीका- ईरान दे ऊर्जा ते यातायात ढांचे गी नशाना बनाई सकदा ऐ। तोंआई ईरान नै युद्ध विराम दे अमरीकी प्रस्तावें गी खारिज करी दिता ते दुश्मनी खत्म करने- पुर्ननिर्माण सहायता ते प्रतिबद्ध हटाने दी मंग कीती ऐ। राष्ट्रपति ट्रम्प होरें नाटो मुखें सनें सहयोगी देसें दी आलोचना बी कीती ते आखेआ जे होर्मुज जलडमरु मध्य गी परतियै खोलने लेई उनें'गी मेद मताबक समर्थन नैई थ्होआ।



HM-Teg Bahadur

केन्द्री गृहमंत्री अमित शाह होरें नौमे सिक्ख गुरु श्री गुरु तेगबहादुर हुंदे प्रकाश उत्सव पर देशवासियें गी शुभकामनां दितियां न।

अपनी इक सोशल मीडिया पोस्ट च शाह होरें आखेआ कि गुरु तेग बहादुर होरें मनुक्खता दी रक्षा लेई सर्वोच्च बलिदान दिता। उंनै इब्बी आखेआ जे जालम शासकें दे अन्याय ते अत्याचार दे खलाफ बहादुरी ते निडरता कन्नै पक्के पैरें खडोइयै गुरु तेग बहादुर होरें करुणा ते हमदीं दी बेमिसाल मसाल पेश कीती ही।

<><><><><><>

Artemis II Record

आर्टेमिस-दो मिशन दे अंतरिक्ष यात्रियें इक नमां रिकार्ड कायम कीता ऐ। एह लोक धरती कोला सब्बनै शा मते छिंडे धोड़ी पुज्जने आहले पैहले माहनू बनी गेन ते उनें गी चन्न भलेया साफ रुपे च दिस्सा करदा ऐ। फ्लाई बाई दे दौरान चन्नै दे परले हिस्से च ऐसे नजारे दिक्खने गी लब्बै- जेहदे अजै धोड़ी पैहले कदे नैई दिक्खे गे हे। एह मिशन अपोलो युग दे बाद नासा दी चन्द्रमा पर वापसी ऐ- जेहदे च त्रै अमरीकी ते इक कनाडाई अंतरिक्ष यात्री शामिल न। इस मिशन गी अगले दंऊ बरे च चन्द्रमा दे दक्खनी धूर कश माहनू दी पुज्ज दी दिशा च महत्वपूर्ण कदम मन्नेआ जांरदा ऐ। एह मिशन धरती कोला 2 लक्ख 52 ज्हार 752 मील दूर पुज्जी गेआ- जेहदे नै 1970 च अपोलो 13 आसेआ बनाए गेद 2 लक्ख 48 ज्हार 655 मील दे रिकार्ड गी त्रोड़ी दिता ऐ।

<><><><><><>

IPL

IPL क्रिकेट च कोलकाता दे Eden Garden च कल रातीं कोलकाता नाइट राइडर्स ते पंजाब किंग्स बश्कार मैच बरखा कारण रद्द होई गेआ। कोलकाता नाइट राइडर्स नै टॉस जितियै पैहले बल्लेबाजी करने दा फैसला कीता हा। कोलकाता नै खेड्ड रोके जाने तगर 3 ओवर 4 गेंदे 2 विकेटें दे नुक्सान पर 25 रन्ज बनाए हे। कोई नतीजा नैई निकलने पर दौनें टीमें गी इक-इक अंक हासल होई गेआ ऐ।

तौंआई अज्जै दे मुकाबले च राजस्थान रॉयल्स ते मुम्बई इंडियन्स आमने-सामने होगंन। एह मैच गुवाहटी दे बरसापारा क्रिकेट स्टेडियम च भारती समे मताबक साड्डे 7 बजे शुरु होग।

<><><><><><>

Shooting -ISSF World Cup

भारतीय नशानेबाज अज्ज स्पेन दे ग्रेनाडा च ISSF राइफल ते पिस्टल विश्व कप च 10 मीटर एयर राइफल ते पिस्टल विश्व कप च 10 मीटर एयर पिस्टल दी मिक्सड टीम मकाबले कन्नै अपने अभियान दी शुरुआत करगंन। पिस्टल मिक्सड स्पर्धा च पलक गुलिया- मुकेश नेलावल्ली कन्नै ते सैन्यम, उज्जवल मलिक कन्नै मिलिये खेडगंन। 10 मीटर एयर राइफल मिक्सड टीम मकाबले च सोनम मस्कर गजानन खडांगले ते श्रुति अर्शदीप सिंह भारत दा नेतृत्व करगंन।

<><><><><><>